

泉州府志卷之七十一

列女六

貞烈二

國朝

○晉江陳士蘅未婚妻黃氏歸有期而士蘅病歿氏遂自經雍正二年 旌表

○晉江徐氏名懿娘許配永春黃成霖未婚成霖客歿于泉氏年二十聞訃自經兄元輔爲殯殮合葬自是連月不雨知府劉侃致祭表廬乃雨雍正五年 旌表建坊

泉州府志

卷之七十一 列女六

一

崇祀

○晉江黃汝觀未婚妻徐氏夫死自經雍正五年 旌表祀節孝祠

○晉江胡氏村家女也拾柴回家途遇王路調戲力拒脫歸路晚又潛入其室氏呼路逃氏忿自縊雍正十三年 旌表

○泉州城守千總王祿原籍山西大同妻林氏莆田人父林元徙居泉氏幼通孝經列女傳父亡事母至孝歸祿敬執婦道祿調任臺灣卒於官氏聞訃忍死俟柩至哭

迎東郊歸奠越日沐浴更衣自經時年三十遺三書二
與弟妹其略曰夫柩至死棺前庶幾不負父母之教無
失夫婦之情唯痛手足永別耳雙親歿矣願弟事舅如
母立志爲人以報所生其一奉舅則謂夫族遠隔歸葬
未能囑以合厝親墳之旁代爲收養嗣子延王氏一脉
也提督馬負書給以匾額乾隆二十七年 旌表建坊

○晉江梁氏錫娘瑞娘乾隆間 旌表建坊

○惠安吳氏名藥娘田家女也甫笄母命往圃取瓜行經
陳景蔗園景見而悅之戲謂曰若敢盜吾蔗耶藥娘詈

泉州府志

卷之七十一 列女六

二

罵景怒遽毆之裂其裳藥娘大聲呼救得脫歸訴諸母
忿甚夜自縊雍正五年 旌表祀節孝祠

○惠安陳氏名珠娘乾隆年間題 旌建坊入祠祀祭

○惠安陳氏名外娘乾隆年間題 旌建坊入祠祀祭此

條據學冊不開事實亦不
聲明是節是烈姑附于此

○安溪陳宗左妻吳氏村民黃偏強污不從氏忿自縊知
縣何審明詳題乾隆十年 旌表

○安溪林鳳妻田氏名快英年二十夫歿七日從容自盡
乾隆二十年 旌表

○同安許彭妾黃氏名招娘遇悍卒張考欲強污不從死
事聞考正法黃旌表

以上皆已經旌表

○晉江尙書林學曾養女阮氏名清霜年二十嫁張開宗
甫一年開宗死越五日阮服嫁時衣鍵戶自經係明貞烈補載

○晉江林彥中妻王氏給諫命岳孫女年二十嫁花燭之
夕彥中陡得危病王氏哭曰死吾分也彥中曰能爲立
後乎諾之彥中卒氏自是臥柩側足不履闕逮夫弟舉
男立爲嗣絕粒顧諸妣曰善撫此孤瞑目而逝

泉州府志

卷之七十一 列女六

三

○晉江郭齊楷妻洪氏南安洪聲偉女年二十四夫歿孝
事舅姑義方訓子及夫服闋有年子稍長母家將奪其
志拜哭夫靈夜自縊死時年三十與齊楷祖母郭主靜
妻李氏殉烈同月日夫祖叔舉人知縣應龔爲之傳

○晉江李肇華通志作驍妻張氏肇華歿未殮氏盛服拜哭乘
諸親出卽閉戶經于屍旁年二十六

○晉江朱氏歸呂氏子事翁姑孝夫歿旣殮欲殉其家防
之密至卒哭日乘閒鍵戶經死

○晉江高士機妻蘇氏名法觀機胞弟士聚妻黃氏名安

觀郡諸生黃某女順治間遭兵亂二氏閉門自縊死安海同日死節婦女十有餘人

○晉江高維新妻陳氏順治間遭兵亂赴三官廟邊投潭而死

○晉江永寧衛林氏夫歐陽八哥以醫遊四方林紡紵自給順治丁亥山賊至恐爲所污偕女子二人投於劉衙前之池里人葬之時林之母家嫂妹三人一經於臥內二赴水死蓋同日有六烈云

○晉江永寧衛林氏歸歐廷琰順治丁亥土賊入據衛城

泉州府志

卷之七十一 列女六

四

林率二女赴水死里中女從死者十數人數日屍浮者相抱持糾結不可解

二條疑爲一人八哥當卽廷琰小名但通志兩存之姑仍以俟考

○晉江鄧某妾扈氏北平人年十七嫡竒妬閉之幽室數年鄧歿乃得出哭奠柩前遂自經死衣帶中有詩二絕云征塵萬里伴夫君冷落深閨哭不聞薄命蛾眉終見妬一縑斷送到燕雲飛燕伯勞今日分斷腸無計暗消魂願從野蝶依青草攜手雙雙到鬼門

○晉江蘇獻臣未婚妻鄭氏夫歿聞訃閉戶飲泣夜沐浴更衣私囑幼婢曰死必合葬於蘇遂自經死顏色如生

○晉江歐陽氏女名肅娘受林子聘林病迎歸未婚林歿女誓不更適還居母家未幾二親殞弟幼女勤苦撫教林家欲議立嗣請女歸女曰吾生死皆林固當往但幼弟未有託遲之無何寇警欲掠其弟女抱持哀號楚撻不舍賊帥義而釋之時已委頓抵家氣絕其姊端娘嫁莊某數載莊歿一慟而死有歐陽姊妹貞烈之稱

○晉江曾氏適陳保素夫歿以夫弟幼忍死撫之至成立乃告廟曰叔已受室陳氏之鬼不餒矣未亡人今得死所遂絕粒七日卒

泉州府志

卷之七十一

列女六

五

○晉江歐陽復妻黃氏名月娘夫疾禱天願以身代及死絕水漿六日沐浴畢拜辭舅姑就縊死年二十五

○晉江陳元超妻許氏名吉娘元超商於粵卒許聞訃哀慟欲殉念舅老無依乃止既而舅歿鬻衣殮畢遂自經

○晉江翁嗣光妻吳氏夫卒越七日拜辭舅姑從容就縊

○晉江歐陽却郎妻黃氏年二十四夫歿絕粒數日自縊

康熙十六年

○晉江蔡氏適吳瓜生瓜生歿蔡日夜哀號水漿不入口十餘日復自縊

○晉江監生陳豐哲妻楊氏康熙丁巳年泉城遭兵氏年

二十四義不受辱懷孕投井死

○晉江王材妻陳氏歸未幾材歿及葬舅又歿越四日縊死鄉人鳩錢以殮與材合葬豎節烈碑以表之

○晉江莊允謙妻陳氏名開琰夫病始婚入門侍藥病篤籲天請代明年夫死毀簪珥治喪畢從容自縊其時里麥方秀忽變而枯事與吳節婦相類皆出一門督學史及郡縣有司以匾旌之

○晉江陳允壯妻李氏歸九載無子允壯歿誓不獨生族戚議立嗣子後遂自經死時年二十六

泉州府志

卷之七十一

列女六

六

○晉江黃道扶未婚妻鄭氏道扶卒訃至氏卽投繯其母救甦延至數月竟復縊死死之日大風撼里屋拔木知府劉侃給匾旌之南安黃永爲之傳

○晉江莊氏女名完娘許配林仰烈未婚仰烈歿女聞訃號哭不食從容自縊舅家迎柩合葬知府劉侃給匾旌之

○晉江吳寶廷妻謝氏名勸娘事姑至孝時寇發寶廷爲鄉哨長及寇圍城盡遷鄉哨妻子入海至廈門旋令發配勸娘夜整衣北拜姑引帛自縊

○晉江黃德觀未婚妻卓氏名恬觀卓奕紫女夫歿恬觀年十七聞訃密服投繯卒黃家迎其柩合葬有司給匾旌之

○晉江葉維椿繼妻陳氏名居娘年二十六夫死哭奠畢梳洗自縊顏色如生

○晉江林蘭世妻王氏王東成女年十九于歸更六月夫歿喪葬畢遂自縊神色如生

○晉江林安郎未婚妻李氏名香娘安郎歿氏聞訃常絕粒父母再爲擇黃姓納采時氏擲綵花於地曰兒爲林

泉州府志

卷之七十一

列女六

七

鬼不爲黃人至婚期遂自縊距安郎死甫七月氏年十八

○晉江王垂裔妻許氏年二十四夫歿于海無子氏招魂哭奠畢整衣自縊顏色如生南安黃永爲傳

○晉江陳國樞妻王氏名貴娘王勲女年十九夫歿絕粒十日不死自縊知縣某旌以匾

○晉江楊緝妻陳氏名衍娘家寶蓋山前緝賈于外兩子一女皆幼有強暴入其室欲污之氏力拒被毆死知府劉侃題扁旌之翰林陳萬策爲作傳

○晉江曾伍興妻陳氏康熙戊午閒海寇犯鄉氏被擄至吟嘯浦第四橋度不免乘閒躍下死時六月二十有某日也次日屍浮水上顏色如生衣裳不解鄉人異之相傳此處每二年必有溺死者俗謂之交代自陳氏死後遂絕都人感其神異每歲是日必備香楮牲醴橋上祭之至今猶然

○晉江施世儀妻王氏王商伯女嫁六年夫歿絕粒七日梳洗縊柩側知縣張召華給匾旌之

○晉江施士魁妻王氏年二十五夫歿無子不食七日自

泉州府志

卷之七十一 列女六

八

經死知縣張召華題匾旌之

此條係雍正志稿施氏族譜不載疑卽世儀妻之錯

○晉江曾國翰妻王氏歸四月國翰歿越三日自縊以殉知縣黃錫策題扁旌之

○晉江李璇觀妻林氏名信娘夫死無子投繯死節知縣黃錫策以匾旌之

○晉江姚思懿未婚妻陳氏名攀娘以壻貧悔婚氏死之通判陳疇九作詩以旌

○晉江劉士哲一名存乾官或有妻陳氏名連觀年十九歸士哲不數月夫歿哀號設祭祭畢入室自經知縣葉祖

烈躬詣相視顏色如生禮而歛之

○晉江曾兆傳妻蔡氏名招娘忠烈道憲公姪女諸生名臣女年二十四夫歿甫脫服絕粒七日投繯卒雍正八年知縣王之琦給匾旌之

○晉江陳祿妻某氏夫歿子幼舅姑欲奪其志入室自縊
○晉江郡諸生黃憲文妻陳氏夫歿三旬托孤寡嫂自縊
○晉江蔡廸愚妻許氏名慈娘事舅姑至孝年二十二夫歿臨窆欲生從父母舅姑禁之慟屢絕以死自誓三旬奠畢鍵戶自經適父外出俟其歸乃殮經暑五日顏色

泉州府志

卷之七十一

列女六

九

如生

○晉江賴天璽妻黃氏黃增稱女事姑孝謹年二十三夫歿絕粒三日送葬歸哭獻畢拜父及姑入室自縊

○晉江陳天鳴妻黃氏黃孕桂女年二十八夫歿事舅孝更二十三年男女婚嫁畢呼告之曰吾所以不死爲汝曹也今可報爾父地下矣遂自盡

○晉江楊綢觀未婚妻許氏名娥娘許恭觀女綢觀往海外二十餘載斷音耗姑及父母遣嫁氏皆不從守貞至年四十一綢觀終不歸遂絕粒死楊家義之迎主祭祀

以綢觀姪爲嗣

○晉江楊博觀妻陳氏年二十四夫歿無子絕粒七日不死祭奠畢遂自縊

○晉江林汝楚未婚妻王氏王裕曾女名梓娘汝楚歿絕粒一日閉戶自經年方十七夫家迎柩合葬擇宗支爲之嗣

○晉江諸生施嘉惠未婚妻王氏同安王詮奇女嘉惠鄉試歿於福州氏年十七聞訃奔喪接柩慟屢絕孝事舅姑一年至嘉惠小祥日縊柩側家人合葬之以夫姪爲

泉州府志

卷之七十一

列女六

十

之嗣

○晉江朱拱宸妻李氏李士斌女年二十四夫歿殯殮畢一慟而絕

○晉江黃斌美未婚妻吳氏名惜娘美卒惜娘奔喪乞夫姪爲嗣事舅姑孝後嗣子長娶婦紳士請匾于有司旌之遂投繯卒

○晉江黃慶良妻吳氏名邀娘吳榮淑女夫歿大祥哭奠畢沐浴自縊時年二十五知縣胡格給匾旌之

○晉江周日陞妻陳氏年二十一夫歿絕粒三日梳洗自

縊顏色如生知縣程運青旌之以匾家人爲合葬小喜鵲坪

○晉江謝鍾顯妻楊氏諸生國俊女年二十二夫歿一子繼殤遂絕粒卒教諭黃訓導盧皆輓以詩

○晉江莊文觀妻蔡氏夫歿七日自縊以殉

○晉江林如林良從兄弟也其未婚妻陳氏皆臺灣貢生雲從女許如者曰猶兒許良者曰準兒雲從之妻嚴氏不欲其女之涉海行也促爲書悔婚遺其稿二女見駭之未久林報書至如已別婚猶兒謂準兒曰我不死媒

泉州府志

卷之七十一

列女六

十一

其來矣作將嫁裝遂自縊越明年林書再至良又別婚矣準兒曰姊已先行吾待此耳亦死如猶兒猶兒死之日林如在泉見之癩葬之日有女嘲之口眼歪斜跪謝乃已雲從之室二女輒現徙宅而空之林家人聞而義焉設主以祭負其骸歸更葬之處有老婦夜見二女年可二十許笑謂曰與若爲鄰矣忽不見明朝視之塚邇其居

○晉江蔡賓實未婚妻蔣氏年十九賓實卒氏聞訃盡出裝資分給親戚絕粒七日不死遂自縊知縣黃給匾旌

之

○晉江曾必秀妻邱氏名丑娘邱第觀女年二十五夫歿卒哭拜辭舅姑自縊顏色如生

○晉江吳化育妻李氏化育七歲父歿養於節母傅氏及傅卒哀過慟越十三日繼亡無子李氏殯葬畢曰吾其偕夫侍舅姑矣遂櫛沐投水死

○晉江黃泰觀妻葉氏名勗娘葉齊淑女年十九夫溺海死訃至招魂哭奠三日辭父自縊殯時顏色如生

○晉江丁鎮觀妻蔡氏名千娘舉人鍾璉女年二十七夫

泉州府志

卷之七十一

列女六

十二

歿鬻簪珥殯葬營雙壙豫同穴遂自縊死

○晉江林夢觀妻蔡氏名謹娘蔡以樽女年十七夫歿孤幼鞠養成立於夫忌日會戚族出產業契券囑曰氏夫死命以孤延今孤成立氏可見夫矣遂沐浴自經死

○南安諸生葉

一作蔡

應選妻李氏名瑞娘諸生覺女生一

男不育應選卒遂絕粒潔治衣服伴爲歸寧計家人不及防遂自縊年二十一

○南安吳肇焯妻陳氏晉江陳雨玉女年二十一夫歿以幼子囑姑投繯卒時家有豕忽變白捨之報親寺

○南安趙允芳妻傅氏名敏娘允芳卒傅年二十二無子奉姑撫夫弟數載有豪弁欲奪其志氏若不聞者爲夫措窀穸於祖墳之旁囑土工爲留一席地約所善女伴云將有遠行某日幸相過女伴疑其戲耳尋白姑曰小郎漸長婦死無憾矣姑力挽之佯諾夜自經後園橘樹下卽向所預約之期也

○南安黃攀妻傅氏夫歿誓以身殉擇夫功侄立爲嗣於小祥日從容自縊

○南安傅氏女許聘貢生吳而升女父後移家臺灣被累見收女年十五歿入陳某家陳妻劉氏憐女無辜善護之女恐見辱矢志必死偵室中無人惟舊媪張在側與之語愴然淚下旣而脫耳環授媪曰已矣媪出遂投繯

○南安諸生潘錫爵妻某氏夫死絕粒以殉

○南安吳敬祖妻蔡氏名潛官諸生鍾曇女家貧勤女紅孝敬年二十二夫歿不食數日自縊尸側敬祖母見貞節傳

○南安許科适妻楊氏名猛娘海氛适充鄉哨與氏及幼子皆爲賊所擄至廈門适逃歸氏被發配義不受辱棄

幼子道旁自縊死時年二十五後子流落海澄及長歸宗人以爲貞烈之報

○南安潘奧妻杜氏名省娘晉江人年二十七夫歿以姑與子托夫功兄祭奠七日畢遂自縊面色如生

○惠安王錫祉妻張氏夫歿慟哭幾絕至成服日矚夫兄弟事翁姑遂投繯而死巡按錫匾曰共姜遺則

○惠安王汝妻鄭氏仙遊人順治初被賊掠過洛陽橋投江死越日屍出顏色如生

○惠安王定安妻陳氏順治十三年寇至與子某媳游氏俱爲所獲子被殺游投井死陳號泣曰婦能殉夫余忍獨存亦繼之

○惠安蘇氏名聘娘許字孫高年十七孫高爲虎所啣聘娘聞訃欲身殉姑以年老家貧哀諭遂留奉姑逾年竟絕粒死

○惠安張榕妻林氏婚二載有娠而夫遠遊不返順治間海氛城陷寇入門奪其子遂與夫叔母莊氏同縊林年二十八有畜犬哀號尸旁不去寇大駭焚其屋火化之犬亦死

○惠安塗嶺劉某妻陳氏年二十夫歿治喪畢登臺自縊
知縣某給匾旌之事在順治五年

○惠安陳孫思妻張氏貢生受鑄女幼讀書識大義歸未
久夫歿卽投井家人救之誓爲立嗣稍解康熙丙辰有
賊寇氏呼兄與訣夜深題壁云獨守冰霜十二秋因將
繼嗣忍身留乾坤此際應裁決免使貞魂劍下休遂投
縵而死經日顏色如生郡人丁煒爲作傳

○惠安陳毓妻劉氏毓沒七日自縊死知縣楊鶴齡給匾
旌之陳毓作毓侃一

泉州府志

卷之七十一

列女六

十五

○惠安孫洪籌妻鄭氏母陳訓女最嚴故氏幼卽端莊年
二十于歸洪籌已病不能起氏獨廟見越二月洪籌將
死乞嗣子於其三兄囑氏撫之氏泣不能語洪籌卒氏
謂小姑曰爾兄囑撫孤吾意在從死今當兩成之至小
祥自製殮服以線連綴爲一另製素衣以與嗣子闔戶
自縊臨川李紱爲表其墓

○惠安張亮妻陳氏亮沒子方五歲氏以死自誓越二日
縊死知縣田廣運題匾旌之

○惠安薛得華妻黃氏未嫁而夫歿氏年二十一往夫家

守貞舅姑爲立嗣氏竭力奉養孝道無缺三年姑亡氏哭慟遂不食七日死康熙五十年知縣田廣運給匾旌之惠邑另載有薛榮妻黃氏事蹟與此相同意得華卽榮之字也今不重載

○惠安朱磐妻陳氏諸生明獻女年十八夫歿自縊

○惠安張氏二烈順治甲午賊陷城被逼不屈投火死

○惠安王芝山妻莊氏莊瑜世女年二十二夫歿撫孤事舅姑孝及舅姑謝世孤歿遂沐浴夫靈前自縊時年三十八

○安溪亡名氏女順治初寇掠村鄉被迫不從寸磔而死

泉州府志

卷之七十一 列女六

十六

相傳此女爲林家婦云

○安溪柯仲妻殷氏歸未逾年仲歿七日自縊姑泣救甦邑豪有強委禽者氏慟顛于官知縣徐騰鯨爲解之數日自縊死年二十一

○安溪楊淑春妾林氏晉江人春贅林家十日回安溪再來則病矣氏席地床前侍不解帶交睫者數夜迫除春復歸家明歲歿而未訃氏猶祈以身代及訃至掩袂哭不能成聲呼天者再入室縊死楊家迎柩與淑春合葬年二十二

○安溪李氏名田姑總兵日煜女藍國圃妻歸三月夫卒絕粒七日外家往視強起縞素拜辭舅姑曰婦人從一而終命矣夫闔扉奄忽而逝年二十二

○安溪林構成妻李氏名纘娘年二十四生子錫奎而構成卒奎四歲病危氣絕李告舅姑曰未亡人所以不死者爲林氏三世祇此一孤今孤又歿不能復生矣一慟而殞移時奎復甦祖父母撫養成立奎子琅舉人

○安溪高洛未婚妻詹氏名京娘父母早亡依叔洛外出不還舅姑許改嫁氏守義不移待字二十載聞洛卒投

泉州府志

卷之七十一

列女六

十七

溪而死撈出顏色如生事在康熙辛卯年

○安溪王熙載妻林氏年二十夫歿不食數日卒

○安溪林氏名素娘適白元暢年二十一夫歿撫夫姪爲嗣七歲而歿慘慟自縊家人救甦後防稍寬梳盥整衣裳復縊卒

○安溪李濃雲妻鄭氏未婚夫病危氏年十九往侍藥六閱月夫歿哀慟而殞

○同安二烈婦失其姓順治戊子寇亂嫂與小姑避賊石馬寇至挾小姑不從以刃搯其胷血濺寇面死旋挾嫂

嫂又不從寇亂斫之二屍顏色如生

○同安杏根塘順治年間有騎兵挾女數十一女散髮出馬自沉於水索之不得四五日後有弟自漳來匝塘一慟屍自浮出竅血汪然

○同安陳是演一作濱妻周氏夫卒慟絕復甦私辦殯具至卒哭日沐浴更衣縊死

○同安義娘失其氏王觚騰鷺島人也甫及笄遭亂被擄以頭觸石幾碎行至東嶽道旁有井投而死其後天寒月白每見一女子往來井畔康熙十二年鄉人蘇貴夢見

泉州府志

卷之七十一 列女六

十八

女子曰吾屍陷井中君能出而瘞之乎吾厚報子於是鄉人掘井果見白骨以素練衣裹合之毛髮森然及葬素練俱化爲水鄉人異之爲立祠於墳上號曰義娘井曰義井時有病者得井水飲之卽愈道路之人多以竹筒盛水而去外省亦著聞焉

○同安紀四妻蔡氏名五娘順治丙申賊掠其家刼以刃不受辱賊殺之至死猶手執衣帶不脫

○同安黃安觀妻許氏名高娘夫亡慟絕復甦者屢及週年父母誑使歸寧欲奪其志氏於夫小祥日伺母外出

遂自經死

○同安陳泗觀妻黃氏名二娘夫卒自縊死

○同安黃興妻莊氏興以唱戲爲生時或寄其餘資付氏爲事翁之費翁歿氏賣薪市棺不給泣貸富家期以夫回刻償及夫病客所求夫之中表與幼弟偕行覓夫扶歸夫卒氏悉出其弊衣殘器以償負者服藥而死隣人義之爲殮而合葬焉

此條省志誤入晉江

○同安諸生周之翰妻鄭氏康熙甲寅年寇夜掠氏恐見汚赴水死

泉州府志

卷之七十一 列女六

十九

○同安吳子俊妻林氏夫死卒哭日縊家人解之復引藥自刃皆以救故不獲死乃佯爲歡笑如常防稍懈自縊

○同安林忍娘從夫以軍籍汎海澄夫死哭奠畢自縊

○同安劉畿妻葉氏夫爲盜所殺葉卽自經以殉

○同安劉脩妻鄭氏名隨舍舉人中階女年十八嫁夫夫歿明年投繯死

○同安林氏名城娘適邑坂上陳氏子夫死林年十七遂以夫魂帛經死

○同安陳雙妻黃氏雙死自經以殉鄉人義之與葉賞妻

周氏同立祠於灌口名雙節祠

○同安葉賡朝妻郭氏諸生子璋女家貧脫簪珥佐中饋夫亡時年二十四毀形絕粒而卒

○同安楊六妻王氏夫死年十七撒帷之日集父母兄弟曰勿驚吾繼姑也投繯而逝

○同安沈勇妻楊氏夫死自縊殉之年二十四

○同安陳京妻許氏名初娘爲豪家所逼義不受辱被豪擊死屍無完膚後豪每見許爲祟暴死

○同安諸生劉宗道妻李氏宗道以乩仙被執李不肯上

泉州府志

卷之七十一 列女六

二十

馬被裂其屍英魂不化至今西源人祠之

此條據縣志文理頗不可

解未敢以億度改訂姑闕其疑

○同安蔡塘鄉曾家婦陳氏曾溺死陳自經

同安魏準生妻邱氏夫死年二十二母勸其再適不從夫小祥日自盡

○同安陳陣舍未婚妻紀氏名寬舍陣歿寬奔喪入視陣目不瞑寬拭其目矢以身殉哭奠十餘日投繯姑解之復甦諭之曰烈女之後歲多大旱汝以一人累一邑不如無死爲愈寬曰無庸憂也我死將殮置水一碇於棺

下有旱祈雨以此水潑吾棺雨卽沛竟再投繯而死後果大旱以其言試之立驗

○同安劉氏名宜娘許字蔡德德死宜娘誓不再嫁有議婚者至遂投繯死

○同安李燕未婚妻林氏名科娘燕力學疾卒科娘聞訃沐浴更衣自縊以殉繯絕墜地挺立不仆前一夕里人夜見神燈千餘從隸岸至其家知縣徐以匾旌之

○同安諸生鄭毓濬未婚妻洪氏名標娘毓濬試臺灣船被風飄逾年無踪父再議婚不從遂自盡

泉州府志

卷之七十一 列女六

二十一

○同安林氏名雅娘許字海澄謝昂昂病劇母彷彿見女子榻前以爲祟也禳之如故昂死雅娘自縊昂母憐之往視其殮驚曰曩之日侍兒病者乃吾婦耶吾習其容久矣兩家異之合葬焉

○同安張氏許聘陳郊郊歿張年十九聞訃奔喪越三年自縊死與郊合葬

○同安黃氏名奕娘許字王鳳鳳歿臺灣訃至奕娘自經

○同安陳氏名八娘許字林萬燧聞夫死以身殉

○同安吳氏許字林焯焯歿氏年十九聞訃奔喪一慟而

絕

○同安石氏名錦娘許字林原原歿錦娘聞訃服藥而斃
○同安王對妻昭娘遺其姓對舟行覆死昭娘設奠週七
七沐浴更衣自縊

○同安王允觀未婚妻郭氏名富娘年十八先歿氏聞訃
奔喪慟絕王家懼送歸遂投繯而死知縣劉親奠表其
門

○同安郭定紹妻葉氏夫歿殯殮畢自縊雍正三年祀節
孝祠

泉州府志

卷之七十一

列女六

二十二

○同安諸生郭朝藩妻馬氏夫以省試旅歿氏于卒哭自
縊雍正七年祀節孝祠

○同安陳氏子未婚妻張氏年十九夫歿奔喪事舅孝更
十年嗣子弗類嘆曰吾望絕矣遂自經

○同安林睿未婚妻盧氏盧國海女夫歿請奔喪母不許
乃絕粒自製喪履履成適有議婚者遂自經時年十八
晉邑諸生黃夢琳爲之傳且輓以詩

○同安陳錦郎未婚妻周氏名菊娘周岐裁女錦郎卒氏
將赴陳守節父母不從更數日遂投井死時年十九

○同安莊時悅未婚妻施氏名姒娘施奕燾女時悅卒痛不欲生格於父母不得奔喪踰年父母議改適乃密屬鄰婦引至夫家拜見舅姑請爲夫立後舅姑哀其意爲置繼嗣閱九年見嗣子漸長遂自經時年二十有九

○同安池繼英妻黃氏名業娘黃袞女夫歿無子以兄幼子爲後氏卽欲殉夫舅勸之撫孤無何舅卒孤殤氏勤女紅爲夫還負債畢遂服毒而死時年三十有二

○同安林君發妻周氏名潤娘舉人鶴山女嫁半載夫歿持服哭奠如禮旣卒哭遂絕粒而死紳士並弔以詩

泉州府志

卷之七十一

列女六

二十三

○同安蔡亞妻盧氏名惜娘盧言女年二十一夫歿殮葬畢更衣自縊與其嫁時同月日

○同安杜惠光未婚妻陳氏名玉娘陳英世女性幽靜勤紉織年二十聞惠光歿卽於是夜投井死

○同安蔡君坦妻彭氏名京娘歸三載未有子夫歿殮葬臨窆將殉家人救出自是嚴防之京娘朝夕奉奠如常一日晨起出汲佯作僵仆帶濕衣入獻羹飯託言入室更衣卽閉戶自經時年二十有五紳士私諡曰貞烈競爲詩歌輓之

同安葉鳳啗未婚妻蘇氏名徧娘蘇良弼女鳳啗卒與其母豫定死期自製周身衣服請舅姑至家拜訣囑以攜柩合葬爲夫立後囑畢與女戚訣別從容投繯而死時年二十知縣胡格給匾旌之

○同安陳植璧未婚妻周氏名姜娘貢生岐寶女植璧歿聞訃慟絕將殉其母防之甚周閱八月值其母歸寧乘閒投井死知縣明新給匾旌之紳士競爲詩歌以弔輓焉

○同安余興世妻黃氏黃旦女歸二年生一子夫歿孤繼殤遂自經死時年二十有一知縣鄒召南表其閭

以上皆未經 旌表

○惠安李漢世妻張氏 ○惠安張璟妻林氏安溪人

○惠安陳白舍妻王氏 ○惠安張學衡妻何氏

○惠安舉人陳正陞未婚妻張氏

○惠安何家駮妻王氏

○惠安黃廷珪妻陳氏

○惠安黃嗣烈妻陳氏

以上皆雍正年間未

者姑存以俟考

續脩貞節

國朝

○晉江蔡懋英妻龔氏龔蓼英女年二十六夫歿耕織養姑葬舅姑及夫柩卒年五十四

○晉江陳惟江妻曾氏年二十九夫歿事姑孝撫三子成立督學周學健旌以匾氏卒年八十八

○晉江莊元昆妻謝氏年二十一夫歿事舅姑孝撫子鎬爲諸生氏卒年八十三

泉州府志

卷之七十一

列女六

二十五

○晉江蔡士聰妻周氏年十八夫歿家貧無子守志持齋終身卒年七十二

○晉江黃福唐妻呂氏諸生晟英女樂亭令黃賜英婦年二十八夫歿事姑孝撫子天保爲諸生氏卒年六十八

○晉江郭士旻妻陳氏舉人教諭陳庚元長女年二十五夫歿孝養舅姑撫週月子成立氏卒年六十五

○晉江周拔霄妻莊氏年二十六夫歿力貧事姑撫四歲幼子成立氏卒年五十四

○晉江郭章武妻吳氏年二十八夫歿事姑孝撫三歲幼

子成立氏現年五十

○晉江陳朝祝妻阮氏年二十一夫歿事舅姑孝撫三歲幼子成立現年五十

○晉江黃世輔妻李氏年二十八夫歿撫子成立孫鳳騰爲諸生

○南安洪邦光妻蔡氏長泰舉人任善化令蔡洛之女年二十一夫歿舅鵬爲電白訓導家於粵先卒氏孝事兩代嫜闡維謹及祖姑與姑謝世計異鄉非守節地卽揭幼子應昌回籍道經漳其母若兄以父現居官欲畱之

泉州府志

卷之七十一 列女六

二十六

居泰氏不可至家拮据育子成立既爲諸生復歿氏仍撫其孤孫現年七十餘歲

○南安蔡思天妻葉氏年二十七夫歿事舅姑孝撫三子成立現年六十八

○惠安諸生曾士林妾劉氏年十九而寡無子佐嫡撫養嗣子成立卒年七十三

○同安蔡錫達妻謝氏年二十八夫歿事舅姑孝撫三子成立卒年七十三

以上皆未經旌表

名媛

宋

晉江人官內翰蘇紳妻魏國太夫人陳氏龍圖閣直學士從易女而丞相頌母也從易守廣州有清德爲仁宗所知元豐中神宗問頌母誰氏頌以從易女對神宗曰天聖間學士耶從易紳頌皆嘗守杭夫人三至杭邸題邸柱云吾少從父至此中與吾夫偕來今同吾兒凡三閱江山之勝蘇文忠挽詞雞鳴爲善日日新八十三年如一晨豈惟家室宜壽母實爲朝廷生異人

晉江曾氏曾會女而魯公公亮妹也嫁侯官御史王平封

泉州府志

卷之七十一

列女六

二十七

金華縣君生子五人回向固同罔皆有學行回爲有道儒宗向罔尤有文三人皆身在隱約而聲震天下縣君受其子祿於京師而魯公方當國然處里舍彌約及其後回向固同皆早世人謂不堪縣君能自廣以理未嘗亂其志教養其子孫至男有立女有歸

晉江謝伯景母某氏好學通經自教其子有女希孟爲進士陳安國妻所作詩百餘篇歐陽脩稱其隱約深厚守禮不放有古幽閒淑女之風

晉江人贈徽猷閣待制傅察妻趙氏趙清獻女也宣和七

年察以吏部員外郎遣接伴金使爲金所殺及察櫬還趙攜子自得白脩避地于泉葬察郡西南之太平嶺卽家焉郡守王十朋挽辭哀能變國俗貴不御鉛華

晉江留恭妻徐氏丞相正婦事舅至孝訓子元剛登科甲晉江呂仲洙女名娘子父疾篤娘子焚香祝天求以身代□□爲粥以進時夜中羣鴉遶屋飛噪仰視空中大星曄煜如月者三翼日父瘳女弟細娘亦相從拜禱娘子卻之細娘恚曰豈姊能之妹不能耶郡守眞德秀嘉之表其居曰懿孝且爲之記

泉州府志

卷之七十一

列女六

二十八

惠安盧氏蔡忠惠襄公母忠惠慶歷初爲諫官有除授非當者屢封還仁宗遇忠惠益厚曰有子如此母賢可知特賜冠帔以寵之

同安楊國安女父患血疾逾年不愈女取肝爲粥以進父疾隨愈里人林士元有記

同安曾三娘年及笄流賊煽亂其父被虜三娘乘馬操戈率衆陷陣欲救其父見勢不敵遂自刎死每夜其地常聞馬跡聲鄉人築宮祀之

元

□□□□恭人名懿字孤徽幼涉書史事琦三十年
賓敬如□□遇事規箴琦所至以循廉稱琦歿吏民咸
致奠賻恭人曰君生不貨死而貨之非其志也一無所
受

同安陳貞女父大臨母張氏以至元壬午生依父母不忍
嫁共女事不出戶持父母喪及嫁二妹相其弟咸有條
理季妹適康早世遺一女收育教誨得其所歸年五十
八卒至元己卯林州判岡孫爲之誌墓

明

泉州府志

卷之七十一

列女六

二十九

晉江朱則文妻陳氏歸不逮事舅姑而思慕出於至誠事
其母最篤洪武初值兵荒家甚窘夢神稱其夫婦孝感
天將賜金未浹旬有光見臥室中發其處得白金三百
餘勸夫勿營資產盡易粟分賑窮乏永樂中母歿夢如
前復得金一百餘以營殯葬迨夫歿羣鼠叫於棺下聲
甚異發之又得金首飾條脫以襄喪事償負直子鑑爲
諸生赴省闈三場試題皆先期見夢後無不符遂登鄉
薦郡人稱嘆爲立孝感坊鑑後官至都御史

晉江翁氏御史慶長女也慶奉勅巡鈔四川不避權貴又

奉勅武當山獻元帝眼珠賜一品服以行亡何坐累下獄慶無子女詣闕上書請代仁孝皇后召入宮留之三月爲宮中女師人以比緹縈

晉江葉氏名三娘葉清居女父母俱歿弟幼族有禍心氏終身不嫁撫幼弟成立卒年七十二

晉江杜義姑蚤失父其弟華幼姑從母撫弟弟稍長姑許人矣杜之宗人利杜母寡子幼有所覲而姑爲其母堅持家內外嶄然不假借杜宗人覲無所得誣謗之所許家爲絕婚姑憤而不嫁久之弟華長娶於王生子昂華泉州府志

卷之七十一 列女六

三十

復天歿姑與王相堅以節益爲杜治田疇濬陂塘貽子孫世世利年七十餘卒杜之子孫葬之先墳傍與其先人並祀姑有婢亦隨姑不嫁惜失其名邑人李光縉爲之傳

晉江黃光瑀妻郭氏年百有三歲其夫教授生徒知府趙恒受業焉郭知書通道理恒治家嚴每訓督子孫過當趙之子孫必迎氏爲解恒長跪受辭焉

晉江太宜人郭氏諸生潘維城妻方伯洙母也父立彥爲尙寶卿旣歸城事舅孝謹事庶姑如其姑事夫之兄弟

無所不和敬佐城讀書非城休不敢休城病太宜人已老尚侍榻寢累月少受文史無不徹通最好太上感應篇古今格言下至本草通書亦經覽閱作詩示洙願子爲官廉以德殊勝斑衣舞老萊詠牡丹詩人生名利等秋葉惟取丹心天地裁雖溱室憂國彤管箴家未之讓也少從父京邸一一能記當日朝政若嚴分宜張司馬王中丞陸錦衣始終成敗老而爲諸郎述之如歷焉

晉江封太安人陳氏廣東副使金時舒母也歸處士金重寶事繼姑盡孝或朴或譴罔不承順泉俗婦人既老多

泉州府志

卷之七十一 列女六

三十一

斷遣家事拜佛持齋惟太安人巫兒齋媪絕不得通夫之仲弟絕嗣臨歿托太安人孤女太安人居常不使離左右于歸之時太安人疾革矣正襟危坐教之婦道而後遣之壽九十一歲

晉江柯遷之母羅氏有賢德當王陽明倡學東南時勉遷之使就學曰是以道鳴者盍往從之富貴何物徒矻矻章句閒與衆人同趨好耶

晉江人官叅政葉寬妻陳氏寬爲蒙城令時邑故無城流賊劉六等突入境寬先往謁守鳳陽獨氏在署乃衣丈

夫衣繫印肘後馳馬入鳳陽與寬時謂令婦正不減令
晉江人官教諭何炯妻林氏名金謀通文墨性至孝少哭
父母哀鄰媪爲之輟食歸炯祀先潔蠲教子女有則子
喬遷大理評事喬遠工部侍郎

晉江賴介石婢吳氏介石與妻相繼卒遺三男皆幼饒於
財厥弟利之夜縱火潛焚廬死其稍長者次與三偶登
梯戲叔潛踢梯次墜殞三仆地亡魂介石之甥侍御陳
儲秀適在賴家憐之置膝以袍覆之甦然亦意謂梯自
墜也吳氏知皆叔所爲懼盡夜負之逃乞食郡市市人

泉州府志

卷之七十一

列女六

三十二

義之爭致錢米遂稍贍買屋以居掘地得窖金數千致
巨富子南溪旣長母事吳還故里清舊業悉充公且釋
乃叔舊怨皆吳教也南溪生子二長貢於鄉次由郡庠
升國學孫入泮者數人吳皆及見之壽八十餘卒大學
士黃景昉爲之立傳書其神主背曰百世不祧蔣德璟
號爲貞義衍宗吳氏

晉江莊自警妻蔡氏入門未數日脫簪珥充舅喪費姑病
抱起居七八日寢食俱廢姑氣絕三四時猶抱不忍釋
手朝夕哭奠哀動舉家莊用賓言曰余門自得蔡氏婦

幾無悍婦余書其事淚尙漣漣下也

晉江楊時春妻林氏姑張氏患瘋疾不能屈伸凡起居皆林與時春扶抱授餐則林口飼之歷三十年不衰

晉江武舉秦鍾城妻黃氏黃龍女也龍任廣西都司鍾城同氏隨任舟中病篤氏年二十二引刀割股減算以延夫命鍾城愈相繼生二男迨十年而鍾城卒氏課二子成人拮据葬舅姑年八十卒

晉江郡諸生黃高孕妻蔣氏蔣光範女事姑周氏至孝姑病垂絕呼天請代姑甦曰死免矣冥冥中有代吾者越

泉州府志

卷之七十一

列女六

三十三

二日蔣卒

晉江人官富峪衛經歷施天德女腹娘母蘇氏生二男天德歿男皆歿腹娘乃其遺腹女也稍長母繼歿腹娘誓志不嫁以存宗祀立姪爲父嗣又歿更立乃成卒時年七十一知縣陳爲之題匾曰奇男子 國朝教諭何奕奇詳請 旌表卽以三字勒諸坊

晉江舉人蘇文昌妻潘氏字燕卿方伯洙女性柔淑能詩著有玉蘭館詩草女鳳輯以行世同時有郭煒妹宜淑與燕卿結詩社別見貞節傳又有蘇姒卿者亦有詩集

燕卿爲之作序

南安鄭陽時妻林氏名姆恩晉江戶部郎中性之女也少隨父官邸通小學諸書及古嘉言善行旣歸陽時生一子維嶽數進妾媵於陽時維嶽旣就學時時佐之讀曰讀書非但欲曉其字句而已當觀古是何人能如此也當陽時兄弟析箸時不無相構姆恩愆愆爲辭讓曰兒之佳惡豈在財哉至其平生不肯逋官府一稅錢也曰食土之毛而闕其稅是皆有神明勾籍焉老而紡績不衰時舉敬姜之言爲諸孫誦之維嶽仕曲靖府同知

泉州府志

卷之七十一

列女六

三十四

南安李義姑年十四父陷大辟攀訴竟不可脫時母兄先歿二弟一侄尙孩姑所以撫之萬方旣成立里媪來言可覓伉儷姑笑曰吾已營邱壠年八十卒人稱爲貞孝義姑

南安黃思通妻吳氏有以鬻女贖罪金遺於門者氏拾藏以俟遺者反索號曰二命俱休矣卽出與之其人祝曰無以報媪願天賜媪所少者時未有子其月卽娠生子翼登舉人官同知

南安監生陳元奎妻黃氏舅病與夫躬進湯劑割臂和藥

而舅愈

南安黃貞女少失怙恃兄客死貞女不嫁佐嫂撫姪姪女長亦不嫁佐姑與母撫弟弟樵於山裹飯往有老翁丐取其餘謂將供姑與母及姊乃復投畀之歸家啓視則燦然明珠也後家以富子孫多登仕籍乃建賜珠堂祀二姑爲不祧祖名得珠處爲仙蹟巖

南安人名佑娘失其姓幼許陳某未婚而夫喪明且極貧父母議更適佑娘不從陳將娶父母不許佑娘乃潛之母姨家借簪姨義之資以衣裳入門泣拜姑執婦道夫以佑娘富家女頗難之佑娘曰男子代父女子代姑際此夫復何恨孝順終身無間言晉江蔡忠烈道憲公爲之傳

惠安張襄惠岳妻陳氏叅政睿姪女岳微時貧爲外家所輕同襟王家子以貲驕之嘗往賀婦翁生辰僕引岳就館誤至王所疾呼往別室氏詰旦勸岳遄歸事岳益謹睿聞戒其家人曰無易張壻他日名位在我上後果貴顯氏封淑人

惠安人官侍御陳濬母張氏濬巡按山東遣使還寄一笥

封識甚固隣姬相詫以爲長物氏曰吾兒素不貪汀必圖籍也啓緘果然衆皆驚歎傳爲美談

惠安黃克晦妻戴氏事姑以孝聞嘉靖閒倭寇猝至子伯羽方數月負姑以逃棄伯羽舂臼中數日寇方退比歸無恙人謂孝感之報伯羽舉人官助教

安溪潘四郎女四娘本福清人洪武中倭亂隨父遷徙念父母全經險難萬死獲生不忍遠離撤環瑱備養至老不嫁及卒葬相傳有神人護其塚

安溪潘按妻林氏名亥娘舅疾不愈氏割股和米煎粿以

泉州府志

卷之七十一 列女六

三十六

供舅頓愈

同安洪溱妻葉氏侍郎朝選母也其始入門舅已卽世獨其姑在姑有二女皆未行宜人出其簪珥衣服上姑曰以此行長姑以此行次姑姑大喜朝選舉進士受封時諸貴人母相與酒席歡宴車服華煥婢女靚麗宜人獨居鄉課諸婢僕耕織而已家事外語絕口姊姒閒朝選權稅浙關三年滿借貸歸宜人曰善勸溱資給之至其叅政廣右頗用刑威宜人聞不善也謂杖人至十足矣何用重爲每遣人至邸舍曰必以語汝主我語如此

同安人官侍郎洪朝選妻蔡宜人其父大賈也適朝選爲諸生家卑狹淖泥滿庭蛛絲虫繭網戶粘壁宜人安之遇客至或餉田夫親與媪婢均勞苦見洪家紡織心悅之晝夜從妯娌姪女輩學紡久之其紡縷可雜苧紗蠶絲織爲衣布乃與坊郭中上家婦女衣布不二從官邸舍紡績啖菜食蠶而已嘉靖中避寇周氏妹之堡賊忽至堡下宜人指井與朝選訣曰堡若陷索婦於此矣

同安鄭星女幼約婚曾氏曾爲不善義當絕女終身不嫁遂能化其一家兄弟三人不析居而星女爲主內政其

泉州府志

卷之七十一

列女六

三十七

兄宗貴者年三十餘喪偶感女弟之義亦不再娶

同安諸生李躍龍妻洪氏夫家貧常客遠方氏紡織以奉舅姑遇病藥必先嘗子婦余氏事氏亦孝氏老病暈絕婦七日夜水漿不入口假寐得夢云欲愈姑病宜服人肉卽割股以進知縣熊汝霖題匾曰儒門雙孝

同安王某妻林氏事夫無忤夫素爲匪一日淫某氏女女父猾胥獲之將殺焉王百方求免不許曰吾女污矣誰娶者必棄若婦而納吾女乃可王曰幸甚胥使王誣婦姦詣官判離婦猝被逐歸母家不嫁私遺姑餉其後胥

女生二子矣夫商於外爲盜所殺胥女旋棄去婦聞涕泣迎屍朝夕饋奠而養其二子

同安蔡公受妻李氏名佑姐家貧事舅姑極孝姑病祝天割股調羹以進遂愈崇禎辛巳直指李嗣京匾旌其門同安義嫂失其姓明季寇掠承姑命棄子背小郎走遇賊小郎被殺嫂自投水死

國朝

○晉江人贈朝議大夫丁抗妻陳氏惠安御史玉輝女按察煒母也少習四子孝經毛詩女誠知大義及歸椁事

泉州府志

卷之七十一 列女六

三十八

姑孝相夫以禮年二十四而寡訓子至嚴夜命背書弗戍誦則於夫靈前慟而撻之嘗與夫兄弟共治書室爲子若姪絃誦地旣而夫兄謁銓鬻池館以供資斧氏愆恩成之無所分取夫弟將析居姑不欲離少子推宅與之移居他室以晨昏稍遠復留五百金爲姑滫瀡之費值海氛有叛奴充邑役倚吏勢將不利諸孤盡斥金鏐釵飾約五百金以免於難卒年三十五後以子貴

贈恭人

○晉江人移居華亭林紹顯妻黃氏性至孝舅姑同病篤

顓天刲臂分投藥鏹以進飲之皆愈鄉老白有司旌之
夫叔嗣環志其事

○晉江劉糞官女名巽官性至孝少喪母撫於祖母年未
及笄祖母病篤禱天剖肝和藥以進血崩潰數日卒

○晉江人官提督吳英妻蔡氏英蚤歲從戎遠出值寇亂
蔡流離顛沛中必負累代木主以行及英貴入籍莆田
氏好施與九橋梁寺觀脩造皆力爲之丙子莆大饑盡
發貯粟三千石復捐金糴海米數千石散給饑民全活
數萬課子應麟應龍應鳳應鵬應鯤俱登仕籍累

泉州府志

卷之七十一

列女六

三十九

封一品夫人年六十四卒

○晉江許其崑妻陳氏其崑遊學遠方姑病危劇不離床
褥氏抱持閱月日夜弗懈脫簪珥易參苓辛苦勞瘁嘔
血數升姑瀕死者屢號天願以身代及歿不食數日喪
殯如禮夫祖叔廷楫爲立孝婦傳紳士請於知縣黃錫
策題匾褒之

○晉江蔡宏烈妻王氏名謹娘事姑至孝姑病篤割股肉
和藥進姑遂愈知縣葉祖烈給匾旌之

○晉江黃氏名愛娘黃愿女值海氛鄉有謝拔者黃家世

僕也恃其弟爲賊魁擄愿脅定婚思洗主僕羞氏稍長深以爲耻屬寇畧平原歿謝拔之子充縣役貫通遂以悔婚疊訟氏於公堂斷髮自誓且言曰女子年長自應婚嫁但以翁夫妯娌易平日奴婢之呼恐辱宦祖願奉母終身耳縣不聽差押完聚氏見事勢已迫服毒而死兄捷鳴冤復以反造擬流知府常光裕按審得實通詳上憲重責謝拔父子枷號氏墳以紓衆憤因成例不合未請旌表常光裕及督學史陸輿皆給匾旌之

○晉江陳貞姑父年老喪媪無子貞姑未字治女紅以奉甘脆自誓不嫁父年九十五卒貞姑哀痛繼殞里人比之北宮嬰兒云

○晉江人官都憲蔡仕舛妻施氏舉人教諭德馨女歸時極貧常煮粃糠雜薯葉爲食勤紡績供祀事及仕舛宦遊於外氏在家撫孤姪如己子悉爲婚娶以舅姑窶窳未安朔望祈天稽首以百計叩地有聲累封恭人衣皆布素且多綻補遇貧苦則盃粥必分後無疾坐逝篋中猶存嫁時衣加命服以殮

○晉江朱達女名實美因父母無男終身不嫁孝養無缺

及父母歿復置祀產充入宗祠以延禋祀卒年八十三知府劉給匾旌之

○晉江人官上海令陳善妾嚴氏蘇州常熟人其父嚴麟如來陳署病將死氏祝天願減算活父不愈割臂肉和藥進乃愈氏年八十一卒嫡子士芝爲之傳

○晉江吳氏名青蓮陳成觀婢也成觀歿妻王氏遺腹生一男甫週歲舅年六十夫弟九齡王氏將死囑之青蓮青蓮時年十七勵志守貞終身不嫁復立繼嗣以輔王遺男仰事俯育無缺於禮青蓮現年六十二王氏之舅壽終已葬夫弟遺子嗣子皆底成立都邑稱之

泉州府志

卷之七十一

列女六

四十一

○晉江丁按察煒女名報珠字含章嫻吟咏未嫁而卒

○晉江貢生陳一策妻吳氏名班字玉姿提督英孫女叅議道應麟女著有綺窓遺吟一卷頗洗去脂粉之習

○安溪林踵觀妻趙氏名和娘舅老病危和娘禱天割股密和藥以進舅遂愈

○同安諸生王明妻余氏海澄人事舅姑至孝姑病禱天割股調羹以進姑夢白衣神人護之遂痊

○同安諸生周子培妻粟氏割股事姑剗臂事夫知縣鄧

麟采徐名覲俱題匾旌之巡撫張伯行亦表其閭

○同安副將陳昂長婦胡氏割股事姑有司給匾旌之

○同安人宮提督陳倫炯妻胡氏事姑孝姑病危割股和藥以進遂愈

○同安葉在繪妻鄭氏年二十四未子脫簪珥爲夫置妾事姑孝順維謹姑年九十卒哭之盡哀感動路人終三年喪氏亦隨卒邑令朱奇珍扁旌之

授同安志載入廣善今附於此

右列女自一至六終

泉州府志卷之七十一終

泉州府志

卷之七十一

列女六

四十二